



Nunatsinni tarnip pissusaanik ilisimatusarnerup iluani ilinniarfimmik imaluunniit pikkorissaanermik pilersitsisoqarnissaannik pisariaqartitsineq kiisalu taakku aningaasaqarnikkut allaffissornikkullu kingunerisassaasat npillugit Naalakkersuisut nassuiaasioqqullugit peqquneqarnissaannik Inatsisartut aalajangiiffisassaattut siunnersuut.

(Inatsisartunut ilaasortaq Mariane Paviassen Jensen, Paarma Lund Kreutzmann, Inuit Ataqtigiit)
(Siullermeerneqarnera)

Qujanaq Inatsisartunut ilaasortanut Mariane Paviassen Jensen aamma Paarma Lund Kreutzmann siunnersuuteqarnissinnut.

Maani nunatsinni ima inissisimavugut, tarnip pissusaanik ilisimasalinnik aamma tarnip nakorsaanik amigaateqarluta. Taakku marluk immikkoortinnissaat pingaaruteqarpoq. Tarnip pissusaanik katsorsaaneq oqaloqatigiilluni peqqissaaneruvoq, pinaveersaartitsinerulluni aammalu tarnikkut ajornartorsiornermi tapersorsorneqarnissamik passunneqarnissamillu nakorsaatitunngikkaluarluni ingerlanneqartarluni. Tarnikkut nakorsartinneq immikkut nakorsamit tarnikkut nappaatinik passussineruvoq nakorsaatiniq katsorsaanermik ilaqakkajuttoq. Pineqartut marluk tamarmik pingaarutillit, pisariaqartitsinernilli assigiinngitsumik matussusiiisut. Maanilu nunatsinni ajoraluartumik taakku marluk annertuumik amigaatigineqarput.

Inuit amerlavallaat tarnikkut nappaatinik passunneqanngitsunik unammilligassaqarlutik inuupput. Ilisimavarput, atornerluinerit, imminut toqunnerit, imminut toqoriaraluarnert kinguaassiuutitigullu atornerluinerit innuttaasuni annertuumik kingunerlutsitsisut.

Aamma ilisimavarput, meerarpassuit inuusuttorpassuillu imaannaanngitsunik eqqarsaateqartartut saaffiginniffissaqaratik. Tassani tarnip pissusaanik ilisimasallit pingaarutilittut inississinnaapput siusinaartumik akuliunnermikkut, tarnip nakorsaa ima nakuutigisariaqartoq napparsimanerpaanik katsorsaasinnaanissamut.

Taamaattumik Demokraatit isumaqarput, nalunaarusiornissamik siunnersuut silatusaarnerullunilu pisariaqartuusoq. Ilinniartitaanermut, ilinniaqqinnissamut pikkorissarnernullu pisariaqartinneqartut ersarissumik paasinissaat atorfissaqartippagut. Atorfissaqartipparput paasissallugu, qanoq ililluta nukiit uagut nammineq pigisatta atorluarsinnaanerit ineriartortissinnaanerallu isumalluuteqartuaannarnitsinniit, inuusuttut nunanut allanut ilinniariartarnerannik.

Tamanna tunngavigalugu ilalernartipparput eqqarsaat maani nunatsinni ilinniarfimmik pilersitsisoqarnissaanik. Tamanna avatangiisinit pilersitsisinnaavoq, tarnip pissusaanik immikkut



ilisimasaqarnermut tarni nakorsaqarnerullu ineriartortissinnaaneraniq uagut nammineq kulturerput kinaassuserpullu aallaavigalugit, aammalu ilinniakkanik tamakkiisunik immikkoortukkuutaanillu pikkorissaanerit neqeroorutigineqarsinnaallutik, soorlu assersuutigalugu perorsaasut isumaginninnermullu siunnersortit suliaminnut pikkorissaqqiffigisinnaasaannik.

Taamaaliornikkut sulisut amerlanerusut, suliaminnut ilisimasallit inuiaqatigiinnilu atugassarititaasunut immikkut ittunut ilisimaarinnittunik peqalersinnaagatta.

Aamma tikkuarusupparput, suliniutit uunga ittut sulisussarsiornermut iluaqutaasinnaammata. Inuusuttut amerlasuut, psykologi-mik psykiatri-millu ilinniagaqarusukkaluartut, tunuaannartarput, ilinniarnissamut periarfissat ungasippallaarneri pissutigalugit. Maani nunatsinni ilinniarfiliussagutta, amerlanerit ilinniagaqarusulersinnaalissapput.

Demokraatinut pingaarnerpaavoq, inuit, ikiorneqarnissamik pisariaqartitsisut, ammasumik tatiginartumillu neqerooruteqarluni sullinneqarsinnaanerit maannakkutut utaqqinermik itigartitaanermilluunniit naapitararalik. Akuerisinnaanngilarput, inuit tarnikkut innarlarsimasut kiserliornissaat, sulisunik neqeroorutaasinnaasunillu amigaateqarnerput pissutigalugu.

Taamaattumik siunnersuut taperserparput neriutitigalugulu, nalunaarusiaq siunissami isummernernut qajannaatsumik tunngavissijumaartoq. Tanip pissusaanik immikkut ilisimasalinnik tarnillu nakorsaanik amerlanerusunik pisariaqartitsivugut. Aamma pisariaqartipparput pilersaarut ersarissaq, qanoq ililluta taanna angusinnaaneripput.

Taamatut oqaaseqaateqarluta siunnersuutip taamatuttaarlu Naalakkersuisuniit allannguutissatut siunnersuut akuerineqarnissaai innersuussutigaarput aappassaaneerneqannginneranilu ataatsimiititaliami susassaqartumi suliareqqinneqartussatut innersuussutigalugit.